



NAGORE LEGARETA

## BERTSO BERRIAK

*Imanol Lazkano*

### Gizonari jarriak

#### I

Ziurrenik lau hankan  
hasi zen aurrena,  
zutituta abitzeko  
munduan barrena.  
Adimen lantzeari  
ekinez hurrena,  
giza historiaren  
lehenengo herrena.

#### II

Pentsamentua janzten  
zihoan heinean,  
ez zen ados besteen  
maila berdinean:  
Kokatu nahiak beste  
guztien gainean  
jarri zun betirako  
nahi ta ezinean.

#### III

Adimen hori lantzen  
hari zenez nonahi,  
bata botere gose  
bestea ere bai.  
Ordura arte zena  
kide edo anai,  
gizona bihurtu zen  
gizonaren etsai.

#### IV

Hasieran zen harek  
lau hankako abere,  
munduko ondasunak  
nahi lituzke bere.  
Arrazoiak ez dio  
balio batere  
indarra nagusi ta  
dirua botere.

#### V

Betik egin ditu  
amets aberatsak  
gehiegi neurtu gabe  
zekartzan akatsak.  
Horrek ekarri ditu  
ondorio latzak:  
kontaminatu gaitu  
sosaren kiratsak.

#### VI

Besteren bizkar bete  
denean kartera,  
mundu xume hontatik  
nahi luke atera:  
Heldu da ilargira,  
agian Martera,  
nahiz anaiak behartu  
lokatza jatera.

#### VII

Alferrik izango da  
asmo onekua  
ta maite bere herri  
edo sorlekua  
ez dezala defenda  
bestela lepua...  
Mundu bat egin dugu  
bihotz gabekua.

#### VIII

Indar militarri  
emanik garrantzi  
armamentuz beteta  
gizalegez ahantzi.  
Hiltzaile txikiari  
kartzelak erantsi,  
handieri txaloak  
ta medailak jantzi.

#### IX

Errepara elizan  
edo politikan:  
egingo dizkigute  
promes politikan  
baina beraiek gertu  
diru pilotikan,  
txikiak ezin aska  
korapilotikan.

#### X

Eskaintzen dizkigute  
dozenan hamalau  
baina guztia lege  
ta guztia arau.  
Garratetik soberan  
gozotikan barau  
aurreratu nahiaren  
atzeraka da hau.

#### XI

Dena degu presa ta  
dena itsumustu,  
bakoitzaren bizitza  
bihurtuz apustu.  
Ez al dugu burua  
neurritz kanpo puztu?  
Esne txarretik bete,  
umoretik hustu.

#### XII

Bada zertan kezkatu  
ta zertaz goibeldu  
azken muturreraino  
ez al gara heldu?  
Izan behar zuenak  
guztien eredu:  
lur madarikatu hau  
gizonak erre du.

**DOINUA:** "Mando baten gainian".



Bidali zure sortak [bertsoak@argia.com](mailto:bertsoak@argia.com) helbidera. Aukeratuak orri honetan argitaratuko ditugu.